

北史

第二函
第十册

北史卷九十五

列傳第八十三

蠻獠

林邑

赤土

眞臘

婆利

蠻之種類蓋盤瓠之後在江淮之間部落滋蔓布於數州東連壽春西通巴蜀北接汝潁往往有焉其於魏氏不甚爲患至晉之末稍以繁昌漸爲寇暴矣自劉石亂後諸蠻無所忌憚故其族漸得北遷陸渾以南滿於山谷宛洛蕭條畧爲丘墟矣道武旣定中山聲教被於河表泰常八年蠻王梅安率渠帥數千朝京師求留質

子以表忠欵始光中拜安侍子豹爲安遠將軍江州刺史順陽公
興光中蠻王文武龍請降詔褒慰之拜南雍州刺史魯陽侯延興
中大陽蠻首桓誕擁河水以北潢葉以南八萬餘落遣使內屬孝
文嘉之拜誕征南將軍東荊州刺史襄陽王聽自選郡縣誕字天
生桓玄之子也初玄西奔至枚迴洲被殺誕時年數歲流竄大陽
蠻中遂習其俗及長多智謀爲羣蠻所歸誕旣內屬居朗陵太和
四年王師南伐誕請爲前驅詔授使持節南征西道大都督討義
陽不果而還十年移居潁陽十六年依例降王爲公十七年加征
南將軍中道大都督征竟陵遇遷洛師停是時齊征虜將軍直閤
將軍蠻首田益宗率部曲四千餘戶內屬襄陽首雷婆思等十一
人率戶千餘內徙求居大和川詔給廩食後開南陽令有沔北之
地蠻人安堵不爲寇賊十八年誕入朝賞遇隆厚卒謚曰剛子暉

字道進位龍驤將軍東荊州刺史襲爵景明初大陽蠻首田育
等二萬八千戶內附詔置西郡十八縣暉卒贈冠軍將軍三年魯
陽蠻魯北鷲等聚眾攻逼頻詔左衛將軍李崇討平之徙萬餘家
於河北諸州及六鎮尋叛南走所在追討比及河殺之皆盡四年
東荊州蠻樊素安反僭帝號正始元年素安弟秀安復反李崇陽
大眼悉討平之二年梁沔東太守田清善擁七郡三十一縣戶萬
九千遣使內附乞師討梁其雍州以東石城以西五百餘里陸
援路請率部曲斷之四年梁永寧太守文雲生六部自漢東遣使
歸附永寧初東荊州表太守桓叔興前後招慰大陽蠻歸附者一
萬七百戶請置郡十六縣五十詔前鎮東府長史酈道元檢行置
之叔興卽暉弟也延昌元年拜南荊州刺史居安昌隸於東荊三
年梁遣兵討江沔破掠諸蠻百姓擾動蠻自相督率二萬餘人頻

請統帥蠻以爲聲勢叔興及一并威儀爲之節度蠻人遂安其年
梁雍州刺史蕭藻遣其將蔡令孫等三將寇南荆之西南沿襄沔
上下破掠諸蠻蠻首梁龍驤將軍樊石廉叛梁來請援叔興遣與
石廉督集蠻夏二萬餘人擊走之斬令孫等三將藻又遣其新陽
太守邵道林於沔水之南石城東北立清水戍爲抄掠之基叔興
遣諸蠻擊破之四年叔興上表請不隸東荆許之梁人每有寇抄
叔興必摧破之正光中叔興擁所部南叛蠻首成龍強率戶數千
內附拜刺史蠻帥田牛生率戶二千內徙揚州拜爲郡守梁義州
刺史邊城王文僧明鐵騎將軍邊城太守田官德等率戶萬餘舉
州內屬拜僧明平南將軍西豫州刺史封開封侯官德龍驤將軍
義州刺史自餘封授各有差僧明官德並入朝蠻出山至邊城建
安者八九千戶義州尋爲梁將裴邃所陷梁定州刺史田超秀亦

遣使求附請援歷年朝廷恐輕致邊役未之許會超秀死其部曲相率內附徙之六鎮秦隴所在反叛二荆西郢蠻大擾動斷三鷄路殺都督寇盜至於襄城汝水百姓多被其害梁遣將圍廣陵楚城諸蠻並爲前驅自汝水以南恣其暴掠連年攻討散而復合其暴滋甚又有冉氏向氏田氏者陬落尤盛餘則大者萬家小者千戶更相崇僭稱王侯屯據三峽斷遏水路荆蜀行人至有假道者周文略定伊瀍聲教南被諸蠻畏威靡然向風矣大統五年蔡陽蠻王魯超明內屬授南雍州刺史仍世襲焉十一年蠻酋梅勒特來貢其方物尋而蠻帥田杜青和及江漢諸蠻擾動大將軍楊忠擊破之其後蠻帥杜青和自稱巴州刺史入附朝廷因其所稱而授之杜青和後遂反攻圍東梁州其唐州蠻田魯嘉亦叛自號豫州伯王雄權景宣等前後討平之廢帝初蠻首樊含舉落內附以

爲督淮北三州諸軍事淮州刺史淮安郡公于謹等平江陵諸蠻
騷動詔豆盧瑩蔡祐等討破之恭帝二年蠻酋宜人王田興彥北
荊州刺史梅季昌等相繼欵附以興彥季昌並爲開府儀同三司
加季昌洛州刺史賜爵石臺縣公其後巴蜀西人譙淹扇動羣蠻
以附梁蠻帥向鎮侯向白虎等應之向五子王又攻陷信州田烏
度田唐等抄斷江路文子榮復據荊州之政陽郡自稱仁州刺史
并隣州刺史蒲微亦舉兵逆命詔田弘賀若敦潘和李遷哲等討
破之周武成初文州蠻叛州軍討定之尋而冉令賢向五子王等
又攻陷白帝殺開府楊長華遂相率作亂前後遣開府元契趙剛
等總兵出討雖頗翦其族類而元惡未除天和元年詔開府陸騰
督王亮司馬裔等討之騰水陸俱進次于湯口先遣喻之而令賢
方增浚城池嚴設扞禦遣其長子西黎次子南王領其支屬於江

南險要之地置立十城遠結涪陽蠻爲其聲援合賢率其卒固守水邏城騰乃總集將帥謀進趣咸欲先取水邏然後經略江南騰言於眾曰合賢內恃水邏金湯之險外託涪陽輔車之援兼復資糧充實器械精新以我懸軍攻其巖壘脫一戰不剋更成其氣不如頓軍湯口先取江南翦其毛羽然後遊軍水邏此制勝之計也眾皆然之乃遣開府王亮率眾渡江旬日攻拔其八城凶黨奔散獲賊帥冉承公并生口三千人降其部眾一千戶遂簡募驍勇數道分攻水邏路經石壁城險峻四面壁立故以名焉唯有一小路緣梯而上蠻蠻以爲峭絕非兵眾所行騰被甲先登眾軍繼進備經危阻累日乃得舊路且騰先任隆州總管雅知其路蠻帥冉伯犁冉安西與合賢有隙騰乃招誘伯犁等結爲父子又多遺錢帛伯犁等悅遂爲鄉導水邏側又有石勝城者亦是險要合賢使其

兄龍真據之騰又密告龍真云若平水邏使其代令賢處之龍真大悅遣其子詣騰乃厚加禮接賜以金帛蠻貪利既深仍請立效乃謂騰曰欲翻所據城恐人力寡少騰許以三百兵助之既而遣二千人銜枚夜進龍真力不能禦遂平石勝城晨至水邏蠻眾大潰斬首萬餘級令賢遁走而獲之司馬裔又別下其二十餘城獲蠻帥并三公等騰乃積其骸骨於水邏城側爲京觀後蠻蠻望見輒大哭自此狼戾之心輟矣時向五子王據石墨城令其子寶勝據雙城水邏平後頻遣喻之而五子王猶不從命騰又遣王亮屯牢坪司馬裔屯雙城以圖之勝慮雙城孤峭攻未可拔賊若委城遁散又難追討乃令諸軍周迴立柵遏其走路賊乃大駭於是縱兵擊破之禽五子王於石墨獲寶勝於雙城悉斬諸向首領生禽萬餘口信州舊居白帝騰更於劉備故宮城南八陳之北臨江岸

築城移置信州又以巫縣信陵秭歸並築城置防以爲襟帶焉天和六年蠻渠冉祖燾冉龍驤又反詔大將軍趙闓討平之自此羣蠻懼息不復爲寇

獠者蓋南蠻之別種自漢中達于邛笮川洞之間所在皆有種類甚多散居山谷略無氏族之別又無名字所生男女唯以長幼次第呼之其丈夫稱阿暮阿段婦人阿夷阿等之類皆語之次第稱謂也依樹積水以居其上名曰干闌干闌大小隨其家口之數往往推一長者爲王亦不能遠相統攝父死則子繼若中國之貴族也獠王各有鼓角一雙使其子弟自吹擊之好相殺害多死不敢遠行能臥水底持刀刺魚其口嚼食並鼻飲死者豎棺而埋之性同禽獸至於忿怒父子不相避唯手有兵刃者先殺之若殺其父走避外求得一狗以謝不復嫌恨若報怨相攻擊必殺而食之平

常劫掠賣取諸狗而已親戚比鄰指授相賣被賣者號哭不服逃
竄避之乃將買人指捕逐若亡叛獲便縛之但經被縛者卽服爲
賤隸不敢稱良矣亡失兒女一哭便止不復追思唯執楯持矛不
識弓矢用竹爲簧羣聚鼓之以爲音節能爲細布色至鮮淨大狗
一頭買一生口其俗畏鬼神尤尙淫祀所殺之人美鬢髯者乃剝
其面皮籠之於竹及燥號之曰鬼鼓舞祀之以求福利至有賣其
昆季妻孥盡者乃自賣以供祭焉鑄銅爲器大口寬腹名曰銅釁
旣薄且輕易於熟食建國中李勢在蜀諸獠始出巴西渠川廣漢
陽安資中攻破郡國爲益州大患勢內外受敵所以亡也自桓温
破蜀之後力不能制又蜀人東流山險之地多空獠遂挾山傍谷
與夏人參居者頗輸租賦在深山者仍不爲編戶梁益二州歲伐
獠以裨潤公私頗藉爲利正始中夏侯道遷舉漢中內附宣武遣

尙書邢巒爲梁益二州刺史以鎮之近夏人者安堵樂業在山谷者不敢爲寇後以羊祉爲梁州傅豎眼爲益州祉性酷虐不得物情梁輔國將軍范季旭與獠王趙清荆率眾屯孝子谷祉遣統軍魏胡擊走之後梁寧朔將軍姜白復擁夷獠入屯南城梁州人王法慶與之通謀眾屯於固門川祉遣征虜將軍討破之豎眼施恩布信大得獠和後以元法僧代傅豎眼爲益州法僧在任貪殘獠遂反叛勾引梁兵圍逼晉壽朝廷憂之以豎眼先得物情復令乘傳往撫獠聞豎眼至莫不欣然拜迎道路於是而定及元桓元子真相繼爲梁州並無德績諸獠苦之其後朝廷以梁益二州控攝險遠乃立巴州以統諸獠後以巴酋嚴始欣爲刺史又立隆城鎮所綰獠二十萬戶彼謂北獠歲輸租布又與外人交通貿易巴州生獠並皆不順其諸頭王每於時節謁見刺史而已孝昌初諸獠

以始欣貪暴相率反叛攻圍巴州山南行臺勉喻卽時散罷自是
獠諸頭王相率詣行臺者相繼子建厚勞賚之始欣見中國多事
又失彼心慮獲罪譴時梁南梁州刺史陰子春扇惑邊陲始欣謀
將南叛始欣族子愷時爲隆城鎮將密知之嚴設邏侯遂禽梁使
人并封始欣詔書鐵券刀劔衣冠之屬表送行臺子建乃啟以鎮
爲南梁州愷爲刺史發使執始欣囚於南鄭遇子建見代梁州刺
史傅豎眼仍爲行臺豎眼久病其子敬紹納始欣重賂使得還州
始欣乃起眾攻愷屠滅之據城南叛梁將蕭玩率眾援接時梁益
二州並遣將討之攻陷巴州執始欣遂大破玩軍及斬玩以傅曇
表爲刺史後元羅在梁州爲所陷自此遂絕及周文平梁益之後
令在所撫慰其與華人雜居者亦頗從賦役然天性暴亂旋致亂
動每歲命隨近州鎮出兵討之獲其生口以充賤隸謂之爲壓獠

焉後有南旅往來者亦資以爲貨公卿達於人庶之家有獠口者多矣恭帝三年陵州木籠獠反詔開府陸騰討破之周保定二年鐵山獠又反抄斷江路陸騰又攻拔其三城天和三年梁州恒稜獠叛總管長史趙文表討之軍次巴州文表欲率眾徑進軍吏等曰此獠旅拒日久部眾甚強討之者四面攻之以分其勢今若大軍直進不遣奇兵恐併力於表未可制勝文表曰往者旣不能制之今須別爲進趣若四面遣兵則獠降走路絕理當相率以死拒戰如從一道則吾得示威恩分遣人以理曉諭爲惡者討之歸善者撫之善惡旣分易爲經略事有變通奈何欲遵前轍也文表遂以此意遍令軍中時有從軍熟獠多與恒稜親識卽以實報之恒稜獠相與聚議猶豫之間文表軍已至其界獠中先有二路一路稍平一路極險俄有生獠酋帥數人來見文表曰我恐官軍不識

山川請爲鄉導文表謂之曰此路寬平不須導引卿但先去好慰
喻子弟也乃遣之文表謂其眾曰向者獠帥謂吾從寬路而行必
當設伏險要若從嶮路出其不慮獠眾自離散矣於是勒兵從險
道進其有不通之處卽平之乘高而望果見其伏兵獠旣失計爭
攜妻子退保險要文表頓軍大蓬山下示禍福遂相率來降文表
皆撫慰之仍徵其租稅無敢動者後除文表爲蓬州刺史又大得
人和建德初李暉爲蓬梁州總管諸獠亦望風從附然其種滋蔓
保據巖壑依山走險若履平地雖屢加兵弗可窮討性又無知殆
同禽獸諸夷之中最難以道招懷者也

林邑其先所出事具南史其國延袤數千里土多香水金寶物產
大抵與交趾同以磚爲城蜃灰塗之東向戶尊官有二其一曰西
那婆帝其二曰薩婆地歌其三等其一曰倫多姓次歌倫致帝

次乙地伽蘭外官分爲二百餘部其長官曰弗羅次曰可輪如牧宰之差也王戴金花冠形如章甫衣朝霞布珠璣纓絡足躡革履時服錦袍良家子侍衛者二百許人皆執金裝兵有弓箭刀槊以竹爲弩傅毒於矢樂有琴笛琵琶五弦頗與中國同每擊鼓以警眾吹蠡以卽戎其人深目高鼻髮拳色黑俗皆徒跣以幅巾纏身冬月衣袍婦人椎髻施椰葉席每有婚媾合媒者齎金銀釧酒二壺魚數頭至女家於是擇日夫家會親賓歌舞相對女家請一婆羅門送女至男家壻盥手因牽女授之王死七日而葬有官者三日庶人一日皆以函盛屍鼓舞導從輿至外次積薪焚之收其餘骨王則內金罌中沈之於海有官者以銅罌沈之海口庶人以瓦送之於江男女皆截髮哭至水次盡哀而止歸則不哭每七日燃香散花復哭盡哀而止百日三年皆如之人皆奉佛文字同於天

竺隋文帝既平陳乃遣使獻方物後朝貢遂絕時天下無事羣臣
言林邑多奇寶者仁壽末上遣大將軍劉方爲驩州道行軍總管
率欽州刺史甯長眞驩州刺史李暈開府秦雄步騎萬餘及犯罪
者數千人擊之其王梵志乘巨象而戰方軍不利方乃多掘小坑
草覆其上因以兵挑之方與戰僞北梵志逐之其象陷軍遂亂方
大破之遂棄城走入其郡獲其廟主十八枚皆鑄金爲之蓋其國
有十八世方班師梵志復其故地遣使謝罪於是朝貢不絕
赤土國扶南之別種也在南海中水行百餘日而達所都土色多
赤因以爲號東波羅刺國西婆羅娑國南訶羅迦國北拒大海地
方數千里其王姓瞿曇氏名利富多塞不知有國近遠稱其父釋
王位出家爲道傳位於利富多塞在位十六年矣有三妻並鄰國
女也居僧祇城有門三重相去各百許步每門圖畫菩薩飛仙之